



IV GOVERNUN KONSTITUSIONÁL SEKRETARIA ESTADU KONSELLU MINISTRU

KOMUNIKADU IMPRENSA

Sorumutu Estraordinária Konsellu Ministru iha loron 19 fulan Novembru tinan 2011

Konsellu Ministru hala'o sorumutu estraordinária iha Sábado, loron 19 fulan Novembru tinan 2011, iha sala Sorumutu Konsellu Ministru, iha Palásiu Governu Dili no aprova ona:

1. Dekretu-Lei ne'ebé mak aprova Estatutu Karreira Dosente Universitária

IV Governu Konstitusionál, sensível ba nesesidade kona-ba ezisténsia kuadru timor-oan sira ho kualidade iha Ensinu Superiór, ne'ebé mak estimula dezenvolvimentu ekonómiku, sosiál no kultural nasaun nian, konsidera importante ba implementasaun kuadru legál ida ne'ebé mak regula Instituisaun Ensinu Superiór no karreira espesiál dosénsia nian no investigasaun iha instituisaun sira ne'e.

Nune'e, diploma ne'e estabelese direitu no obrigasaun sira ba sira ne'ebé hakarak tuir karreira professional dosente, hodi kompensa valór husi nia servisu tuir dedikasaun no esforsu ba benifisiu Universidade nian.

2. Proposta Lei kona-ba Autorizasaun Lejislativa iha Matéria Ambientál

Timor Leste nu'udar nasaun insulár no kosteiru, iha ambiente oin-oin barak tebe-tebes no tasi, ho fauna no flora rasik ne'ebé Estadu tenke proteje no conserva.

Solusaun sira ne'ebé tau iha diploma ne'e iha konsiderasaun ba prinsípiu jerál protesaun ambiente nian, instrumentu internasionál oin-oin ne'ebé hetan ratifikasaun tiha ona husi Timor-Leste no sirkunstánsia ekonómika, sosiokultural balun no insularidade País nian.

Proposta Lei autorizasaun ne'e elabora ona ho suporte tékniku Programa Nasoens Unidas nian ba Ambiente no konta ho realizasaun prosesu ida kona-ba konsulta pública hamutuk ho entidade governamentál ne'ebé relevante ho organizasaun la'ós-governamentál sira.